

समाचार

- दीपोत्सव माथे पूरो प्रदेश जगमगायो—दिवाळी काल परम्परागत सिरधा अर उच्छाव रे सागे मनायी जावेला ।
- मुख्यमंत्री भजन लाल शर्मा प्रदेशवासियां ने दिवाळी री शुभकामनावां दी—आमजन सूं स्वदेशी उत्पादां ने काम मांय लेबा री अरज करी ।
- बारां रा अंता विधानसभा सीट माथे होबा वाळां उपचुनाव बाबत् तैयारियां तेज ।

अर

- प्रदेश मांय बत्ती ठौड़ां माथे अक्टूबर रे आखिर ताई रात रो तापमान 15 डिग्री सैल्सियस सूं नीचे रह सके है ।

000

देश भर मांय काल दिवाळी मनायी जावेला । रोशनी रा इण त्यौहार माथे घर—घर मांय सोहवणी सजावट करी जा रही है । बाजारां मांय त्यौहारी उच्छाव निजर आ रह्यो है । लोग पूजन सामग्री, मिठाइयां, दीपक समेत दूजी चीजां री खरीदारी कर रह्या है । धनतेरस सूं शुरू व्हा दीपोत्सव रो तिवार लारला बरस री भांत इण बगत भी 6 दिन रो रहवेला । दिवाळी रे पछे 22 अक्टूबर ने गोवर्धन पूजा अर अन्नकूट व्हेला । वठिने 23 तारीख ने भाईदूज मनायी जावेला । त्यौहारी श्रृंखला मांय आज रूप चौदस अर छोटी दिवाळी मनायी जा री है । रूप चौदस रे चालता महिलावां मांय खासो उच्छाव देख्यो जा रह्यो है । इण दिन साज—श्रृंगार करणो शुभ मान्यो जावे है । मिन्दरां मांय सुवारे सूं ही भक्त ठाकुर जी रा दर्शन करबा ने पूग रह्या है । जन आस्था रा प्रतीक जैसलमेर रा रामेदवरा रा बाबा रामेदव मिन्दर मांय फूलां री सजावट करी गई । बाड़मेर जिला मांय भी दिवाळी रे चालता लोगां मांय उच्छाव निजर आ रह्यो है ।

पाली मांय भी दिवाळी रे मौके बाजारां मांय खरीदारां री खासी भीड़ है । शहर मांय इण मौके खास सजावट करी गयी है । प्राचीन ब्रम्हपुरी रा महालक्ष्मी मिन्दर मांय काल खास पूजन कर्यो जावेला, इण बाबत् मिन्दर ने सोहवणा फूलां सूं सजायो जा रह्यो है । भरतपुर मांय त्यौहारां रे चालता आ दिनां वोक्ल फोर लोकल थीम माथे गाय रा गोबर सूं बण्या उत्पादां री खरीद खातर लोगां मांय खासो रुझान निजर आ रह्यो । इण सामाग्री री दूजां प्रदेशां मांय भी मांग है । वठिने, भारत—पाकिस्तान अंतराष्ट्रीय सीमा माथे बी.एस.एफ. जवान सीमा चौकियां माथे दीयां अर मोमबत्तियाँ जळा र मिठाई बाँटी अर देशवासियां ने दीपावळी री शुभकामनाएँ दी । दीपोत्सव पर्व रे चालता प्रदेश भर मांय सुरक्षा रा पुख्ता बन्दोबस्त कर्या गया है । वठिने यातायात री भी खास व्यवस्था करी गई है । देशी—विदेशी सैळानी

भी दीपोत्सव रो आनंद लेबा खातर प्रदेशभर री पर्यटन री ठौड़ां पूग रह्या है। रेलवे दीवाळी, छठ पूजा अर दूजां त्यौहारां रे चालता यात्रियां खातर गाड़िया रो खास इन्तजाम कर्यो है। न्यारा यात्री भार ने देखता थकां 49 जोड़ी स्पेशल ट्रेनां चलायी जा रही है। वठिने 60 नियमित ट्रेनां मांय 174 न्यारा डिब्बां जोड़्या गया है।

उत्तर-पश्चिम रेलवे रा मुख्य जनसंपर्क अधिकारी शशिकिरण रे मुजब यात्रियां री बढ़ती संख्यां ने देखता थकां खास स्टेशनां माथे केई भांत री खास व्यवस्था करी गयी है। स्टेशनां माथे बत्ता लोग भेळा नी व्हे इण बाबत् प्लेटफोर्म टिकट ने प्रतिबंधित कर्यो गयो है।

000

राज्यपाल हरिभाऊ बागडे प्रदेशवासियां ने दिवाळी री शुभकामनावां दीनी। वणा आप रा शुभकामनावां संदेश मांय कह्या के यो पर्व अंधकार माथे प्रकाश री जीत रो प्रतीक है। दीपक री उजास मांय ही जीवन रो उच्छाव समायो है। वणा कामना करी के रोशनी रो यो तिवारं सगळा रा जीवन मांय खुशियां ले र आवे। वठिने मुख्यमंत्री भजन लाल शर्मा प्रदेशवासियां ने दिवाळी री शुभकामनावां देता थकां प्रदेश वासियां सूं स्वदेशी उत्पाद ने काम मांय लेबा अर पर्यावरण ने ध्यान मांय राख र प्रदूषण मुक्त दिवाळी मनावे री अरज करी।

0000

भीलवाड़ा नगर निगम रा महापौर राकेश पाठक बताया के लोगां रो रुझान स्वदेशी उत्पादन री खरीद माथे है। जीएसटी बचत उत्सव रे पछे बण्या माहौल सूं भी खरीदारी जोरां माथे है।

हनुमानगढ जिला मांय भी जीएसटी बचत उत्सव रो हर तबका माथे चौखो असर देख्यो जा रह्यो है। काश्तकार रोहिताश सैनी रे मुजब जी.एस.टी. दरां मांय कमी सूं उण ने ट्रेक्टर खरीदबा मांय घणो फायदो मिल्यो।

000

खुशियां रा तिवारं दिवाळी माथे वंचित तबगा ने खुशी देबा खातर बांसवाड़ा पुलिस इण बगत अणूठी पहल करी है। बांसवाड़ा पुलिस रा अधिकारी अर जवान वंचित तबका रा टाबरां अर निराश्रित लोगां रा घरां मांय जा र मिठाईयां बांटबा रे सागे टाबरा ने उपहार मांय पढ़बा री सामग्री दीनी, जिण मांय कॉपी, किताब, स्कूल ड्रेस, जूता अर कपडा भेळा है। पुलिस अधीक्षक सुधीर जोशी बताया के पुलिस रो दायित्व कानून व्यवस्था बणाया राखबा रे सागे समाज री कानी संवेदनशील व्हणो भी है।

वे बताया के **मिठाई वाळी दिवाळी** रे जरिये आ टाबरां ने पुलिस ओ संदेश देणो चावे है के पुलिस हमेशां वां रे सागे है।

000

चुनाव आयोग केंद्रीय पर्यवेक्षकां सूं बिहार चुनाव प्रक्रिया अर दूजा राज्यां रा 8 विधानसभा हलकां मांय होबा वाळा उपचुनावां माथे कड़ी निगरानी राखबा ने कह्या जिण सूं पारदर्शी, स्वतंत्र अर निष्पक्ष चुनाव पक्को कर्यो जा सके। आयोग एक बयान मांय कह्यो के उपचुनावां खातर 8 सामान्य अर 8 पुलिस पर्यवेक्षकां री भी नियुक्ति करी गयी है। पर्यवेक्षकां ने राजनीतिक दळां, उम्मीदवारां अर मतदातावां री शिकायतां रा समाधान खातर पूरी बात मुहैया रहबा ने कह्यो गयो है। इण रे सागे मतदान केंद्रां रो दौरा कर मतदातावां री

सुविधा खातर आयोग कानी ऊँ कर्या गया उपायां ने पक्को करबा रा निर्देश भी दिया। बतायो जावे है के प्रदेश मांय बारां जिला री अंता विधानसभा सीट माथे भी उपचुनाव व्हेला। हाल ताई कुल 17 नामापाना दाखिल व्ह्या है। नामांकन भरबा री आखिरी तारीख 21 अक्टूबर है। 23 अक्टूबर ने नामपाना री जांच करी जावेला। इच्छुक उम्मीदवार 27 अक्टूबर ताई नाम पाछा ले सके है। मतदान 11 नवम्बर ने अर मतगणना 14 नवम्बर ने व्हेला।

000

जैसलमेर बस अग्निकांड मांय झुळस्या दो और लोगां री ईलाज रे दौरान जोधपुर मांय मौत व्हे गयी। दोन्यू ही जैसलमेर जिला रा रहवासी हा। इण रे सागे इण हादसा मांय मरबा वाळा री संख्या 24 व्हेगी। ओ हादसो 14 अक्टूबर ने जैसलमेर रे कने थईयात गांव मांय व्ह्यो हो। मरबा वाळां मांय 17 जैसलमेर अर 7 जोधपुर रा निवासी हा। हाल जोधपुर रा महात्मा गांधी सफाखाना मांय 10 घायलां रो ईलाज चाल रह्यो है। इण बीच केन्द्रीय पर्यटन अर संस्कृति मंत्री गजेन्द्र सिंह शेखावत अर संसदीय कार्य मंत्री जोगाराम पटेल सफाखाना पूग र घायल यात्रियां रा बारा मांय जाणकारी ली अर वां रा घरवाळां सूं बातचीत करी। श्री शेखावत सगळा लोगां सूं हादसां मांय घायल व्ह्या लोगां रे बेगी ठीक होबा री कामना करबा री अरज करी।

000

भीलवाड़ा जिलां मांय रबी फसल री बुवाई खातर बड़ा पैमाना मांय तैयारियां करी गयी है। कृषि मेहकमां रा संयुक्त निदेशक बताया के जिला मांय 3 लाख 60 हजार हैक्टेयर हलका मांय बुवाई करी जावेला। वे बताया के इण बगत सब ऊँ बत्ती गेहूं री बुवाई रो लक्ष्य राख्यो गयो है। इण रे इतर सरसों, जौ अर चणा री बुवाई व्हेला वठिने तारामीरा री बुवाई रो काम करीब-करीब पूरो व्हे गयो है।

0000

प्रदेश मांय बत्ती ठौड़ां माथे मौसम रा मिजाज मांय बदळाव व्हे रह्यो है। दिन रा तापमान मांय हलकी गर्माहट है तो रात रा तापमान मांय गिरावट सूं सुवांरे अर सिंज्यां रे गुलाबी ठण्ड रो असर महसूस व्हे रह्यो है। मौसम महकमां रे मूजब अक्टूबर रा आखिरी हफ्ता ताई केई जिला मांय कम ऊँ कम तापमान 15 डिग्री सेल्सियस सूं नीचे रहवण रा आसार है। इण बीच, आवता 24 घंटां मांय भी तापमान मांय उतार-चढ़ाव रो सिलसिलो जारी रहे सके है। बाड़मेर मांय बत्तो तापमान 38 डिग्री सेल्सियस रे आरे-सारे दर्ज कर्यो गयो, वठिने जैसलमेर अर बीकानेर मांय भी पारो 35 सूं 36 डिग्री सेल्सियस रे बीच दर्ज कर्यो गयो। वठिने सीकर मांय कम ऊँ कम तापमान साढे 13 डिग्री सेल्सियस रह्यो। मौसम केन्द्र जयपुर रे मुजब दिवाळी अर उण रे पछे रा दो-तीन दिन ताई आमतौर माथे पर राज्य रो मौसम सामान्य रहवेला।

000

नया आपराधिक कानूनां रो एक बरस पूरो होबा रे मौके राख्यी गयी प्रदर्शनी 21 अक्टूबर ताई चालेला। राजस्थान पुलिस री कानी ऊँ या प्रदर्शनी सीतापुरा स्थित जेईसीसी परिसर मांय लगायी गयी है। लारला एक सप्ताह मांय इण हाइटेक प्रदर्शनी ने बड़ी तादाद मांय लोग देखबा आया। आज छुट्टी होबा रे बावजूद भी घणी संख्या मांय लोग प्रदर्शनी ने देखबा आया।

000